



Iddimangiiu Bianco
inatsisartut@ina.alla.gl
Inatsisartunut ilaasortaq

**Kalaallit Nunaata kangianut pilersuineq pillugu § 37 naapertorlugu
apeqquteqaammut 2025-207-imut akissut**

Dato: 05-01-2026
Sagsnr.: 2025 - 25846
ID. nr.: 79211868

Asasara Iddimangiiu

Inatsisartut suleriaasianni § 37 naapertorlugu Kalaallit Nunaata kangianut pilersuineq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik..

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

**Apeqqut 1: Naalakkersuisut Islandimiit tunumut timmisartuussinerup
ammarnissaanut suliniuteqarpat?**

Akissut: Naalakkersuisut Norlandair-imut kiffartuussinissamut isumaqatigiissuteqarput, Islandip aamma Nerlerit Inaata akornanni timmisartut angallaveqarnissaannik qulakkeeriffiusumik.

Ineqarnermut, Attaveqaasersuutitut Isorliunerusunullu Naalakkersuisoqarfiup 2025-mi ukiakkut Icelandair-ip Islandip Kulusuullu akornanni ukiuunerani timmisartuussisarnerminik unitsitsinerata kingorna, angallavimmut aaqqiissutaasinnaasut pillugit ingerlatseqatigiiffik ingerlaavartumik oqaloqatigisimavaa. Icelandair-imit oqaatigineqartut malillugit angallassineq niuernikkut iluanaaruteqarsinnaannginneq pequtigalugu unitsinneqarpoq.

Kiffartuussinissamut isumaqatigiissummut tapiissuteqartoqassappat, aningaasanut inatsimmi (konto pingaarneq 72.20.05, oqaasertaliussaq nr. 1) ornigassami tunngavissanit pingaarnernit sisamaasunit minnerpaamik ataaseq naammassineqartussaavoq:

- Assartuussinissamut periarfissaqanngikkaluartunut
- Akit peqqutaallutik amerlasuut angalanissamut tunuarsimaarnerinik kinguneqartussaagaluartunut
- Tikittartut akulikissusii akuersaarneqarsinnaanngitsumik appasittussaagaluartunut
- Angallannerup ilusaata ataqatigiinneranik ajortussaagaluartunut

Tunngavissat taakku aallaavigalugit Kulusummut ukiuunerani timmisartuussinermi sullissisussamut kiffartuussinissamik isumaqatigiissusiornissaq periarfissaqarnersoq misissorneqarsinnaavoq. Ukiuunerani unikkallarnissap Naalakkersuisunut ilisimatitsissutigineqarnerani piffissap sivikinnerata kingunerisaanik, sullissinerup uninnginnerani 2025-26-mi ukiuunerani timmisartuussinissamut aningaasaliissutissanik pisariaqartunik qulakkeerinissaq ajornarsimavoq.

Naalakkersuisoqarfimmiit suli 2026/27-mi ukiuunerani Kulusummut timmisartuussinissamut periarfissat misissuiffigineqarput. Kiffartuussinissamut isumaqatigiissusiornissaq pisariaqarnersoq, aammalu sumut aningaasaliissutissat aningaasanut inatsimmut ilanngunneqassanersut misissuineranut ilaatinneqarput.

Apeqquut 1a: Akissut aappiuppat, qanoq?

Akissut: Apeqquut 1-imut akissut takuuk.

Apeqquut 2: Naalakkersuisut umiarsuakkut pilersuineq allannguiffigineqarnissaannik takorluugaqarpat?

Akissut: Tunup nioqqutissanik pilersorneqarnera aamma Royal Arctic Line A/S-ip Tunumut tikittarnerata akulikissusiisa innuttaasut pilersorneqarnissamut pisariaqartitaannut sikoqarneranullu ingerlaavartumik naleqqussarneqarnissaat Naalakkersuisunit aallunneqarpoq. Pilersaarut Tunumut pilersuinerup ilusiligaanera 2025-mut pilersaarutitut naleqqiullugu annertuunik allannguuteqanngilaq.

Naalakkersuisut 2026-mi angalanissanut pilersaarummik iluarsiinissamut aalajangersimasunik pilersaaruteqanngillat.

Apeqquut 3: Naalakkersuisut ukioq 2025 aningaasaliissutit qaavatigut umiarsuarmik inuussutissanik pajuttumik tunumut tikittoqarnissaannik pilersaaruteqarpat?

Akissut: Naalakkersuisut Royal Arctic Line A/S-ip angalanissanut pilersarutaa iluarsisariaqarnersoq ingerlaavartumik naliliiffigisarpaat.

Imaatigut assartuussineq nioqqutissanik sivisuumik atasinnaasunik assartuussinermut naleqquttuuvoq, piffissani umiarsuit angalaffigisaanni sivisuuni nioqqutissat ullulikkat aserujasarmata.

KNi A/S 2025-mi novembarimi uanga Naalakkersuisoqarfinnut ilisimatitsivoq: *"Pilersuisoq sumiiffimmut nalinginnaasumik ukiuuneranut pilersuereerpoq, aammalu assartukkat pilersaarutaasut ukiuunerani nioqqutissanik sivisuumik atasinnaasumik piumasaqarnermut naatsorsuutigineqartumut naammattussaapput"*. Nioqqutissanik sivisuumik atasinnaasunik piumasaqarneq naammassineqarsimammat, Tunumut umiarsuakkut assartuussinernik annertusititsinissamik pisariaqartitsineq killeqartutut naliliiffigineqarpoq.

Taamaattumik Naalakkersuisut Tunumut umiarsuit pilersuisut ilaneqarnissaannut maannarpiq pilersaaruteqanngillat.

Apeqquut 3a: Taamaassimappat aningaasaliissutissat qanoq annertutigissappat?

Akissut: Royal Arctic Line A/S siusinnerusukkat missiliuisimavoq, umiarsuaq ullormut ikinnerpaamik 142.000 koruuninik akeqassasoq. Tamatuma peqatigisaanik ilisimatitsissutigineqarpoq, missiliukkani taakkunani minnerpaaffissaq siunnerfigalugu naatsorsorneqarsimammata, taamaattumillu akiviusut amerlanerunissaat ilimagineqarsinnaasoq.

Ilisimatitsissutigineqartut malillugit silagitsillugu ulluni 4-21-ni umiarsuarmik attartornissaq pisariaqartinneqassasoq, aammalu umiarsuaq sikkussaassappat ullut amerlanerusinnaasut. Akimut matumani paasissutissiissutigineqartumut ikummatissaq ilanngunneqarpoq.

Apeqqummut tunngavissatut allaaserineqarpoq:

"Pilersuinikkut tikittut pisiassat ilaat qeritinneqarsimallutik aserorlutik tunisassiarineqarsinnaajunnaarlutik annaaneqarput"

Naalakkersuisoqarfima pisoq pillugu Royal Line A/S apeqquteqarfigaa. Royal Arctic Line A/S imatut ilisimatitsivoq:

"Ajoraluartumik Tasiilami nassiussanik isumaginninnermi inuit kukkunerannik pisoqarsimavoq. Imeruersaatinik nassiunneqartunik kukkunikkut containerimut nillataartitsivimmut, nioqqutissanut qerisunut iluarineqarsimasunut inissiisoqarsimavoq. [...] Sullitaq qujanartumik nioqqutissanut sillimmasersimavoq, taamaalillunilu matussusiiffigineqarnissamut pisinnaatitaaffeqarsimalluni"

Tamatuma saniatigut Royal Arctic Line A/S ilisimatitsivoq, umiarsuaatileqatigiiffiup siunissami assingusunik pisoqarnissaa pinngitsoorniarlugu suliffeqarfiup iluani suleriaatsini nutartersimagai. Paasisakka malillugit Royal Arctic Line siunissami qanittumi tamanna pillugu tamanut ammasumik ilisimatitsissuteqarniarpoq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga


Aqqaluaq B. Egede